

晉書



帝紀第三

晉書三

唐太宗文皇帝

御撰

武帝

武皇帝諱炎字安世文帝長子也寬惠仁厚沉深有
 度量魏嘉平中封北平亭侯歷給事中奉車都尉中
 壘將軍加散騎常侍累遷中護軍假節迎常道鄉公
 於東武陽遷中撫軍進封新昌鄉侯及晉國建立為
 世子拜撫軍大將軍開府副貳相國初文帝以景帝
 既宣帝之嫡早世無後以帝弟攸為嗣特加愛異自
 謂攝居相位百年之後大業宜歸攸每曰此景王之

天下也吾何與焉將議立世子屬意於攸何曾寺固
爭曰中撫軍聰明神武有超世之才髮委地手過膝
此非人臣之相也由是遂定

咸熙三年五月立為晉王太子八月辛卯文帝崩太
子嗣相國晉王位下令寬刑宥罪撫眾息役國內行
服三日是月長人見於襄武長三丈告縣人王始曰
今當太平九月戊午以魏司徒何曾為丞相鎮南將
軍王沉為御史大夫中護軍賈充為衛將軍議郎裴
秀為尚書令光祿大夫皆開府十一月初置四護軍
統城外諸軍乙未令諸郡正以六條舉淹滯一

曰忠恪匪躬二曰孝敬盡禮三曰友于兄弟四曰絜
身勞謙五曰信義可復六曰學以為己是時晉德既
洽四海宅心於是天子知歷數有在乃使太保鄭沖
奉策曰咨爾晉王我皇祖有虞氏誕膺靈運受終于
陶唐亦以命于有夏惟三后陟配于天而咸用光敷
聖德自茲厥後天又輯大命于漢火德既衰乃眷命
我高祖方軌虞夏四代之明顯我不敢知惟王乃祖
乃父服膺明哲輔亮我皇家勲德光于四海格爾上
下神祇罔不克順地平天成萬邦以乂應受上帝之
命協皇極之中肆予一人祗承天序以敬授爾位歷

數實在爾躬允執其中天祿永終於戲王其欽順天命率循訓典底綏四國用保天休無替我二皇之弘烈帝初以禮讓魏朝公卿何曾王沉等固請乃從之泰始元年冬十二月景寅設壇于南郊百僚在位及匈奴南單于四夷會者數萬人柴燎告類于上帝曰皇帝臣炎敢用玄牡明告于皇皇后帝魏帝稽協皇運紹天明命以命炎昔者唐堯熙隆大道禪位虞舜舜又以禪禹邁德垂訓多歷年載暨漢德既衰太祖武皇帝撥亂濟時扶翼劉氏又川受命于漢粵在魏室仍世多故幾於顛墜寔賴有晉匡拯之德用獲保

厥肆祀弘濟于艱難此則晉之有大造于魏也誕惟四方罔不祇順廓清梁岷包懷揚越八紘同軌祥瑞屢臻天人協應無思不服肆予憲章三后用集大命于茲炎維德不嗣辭不獲命於是群公卿士百辟庶僚黎獻陪隸暨于百蠻君長僉曰皇天鑒下求人之瘼既有成命固非克讓所得距違天序不可以無統人神不可以曠主炎虔奉皇運寅畏天威敬簡元辰升壇受禪告類上帝永答衆望禮畢即洛陽宮幸太極前殿詔曰昔朕皇祖宣王聖哲欽明誕應期運熙帝之載肇啓洪基伯考景王履道宣猷緝熙諸夏至于

皇考文王獻哲光遠允協靈祇應天順時受茲明命
仁濟于宇宙功格于上下肆魏氏弘鑒于古訓儀刑
于唐虞疇咨群后爰輯大命于朕身予一人畏天之
命用不敢違惟朕寡德負荷洪烈託于王公之上以
君臨四海惴惴惟懼罔知所濟惟爾股肱爪牙之佐
文武不貳之臣乃祖乃父實左右我先王光隆我大
業思并萬國共饗休祚於是大赦改元賜天下爵人
五級鰥寡孤獨不能自存者穀人五斛復天下租賦
及關市之稅一年逋債宿負皆勿收除舊嫌解禁錮
亡官失爵者悉復之丁卯遣太僕劉原告于太廟封

魏帝為陳留王邑萬戶居于鄴宮魏氏諸王皆為縣
侯追尊宣王為宣皇帝景王為景皇帝文王為文皇
帝宣王妃張氏為宣穆皇后尊太妃王氏曰皇太后
宮曰崇化封皇叔祖父孚為安平王皇叔父幹為平
原王亮為扶風王佃為東莞王駿為汝陰王彤為梁
王倫為琅邪王皇弟攸為齊王鑒為樂安王幾為燕
王皇從伯父望為義陽王皇從叔父輔為渤海王晃
為下邳王瓌為太原王珪為高陽王衡為常山王子
文為沛王泰為隴西王權為彭城王綏為范陽王遂
為濟南王遜為譙王睦為中山王淩為北海王斌為

陳主皇後父兄洪為河間王皇後父弟楙為東平王
以驃騎將軍石苞為大司馬封樂陵公車騎將軍陳
騫為高平公衛將軍賈充為車騎將軍魯公尚書令
裴秀為鉅鹿公侍中荀勗為濟北公太保鄭冲為太
傅壽光公太尉王祥為太保睢陵公丞相何曾為太
尉朗陵公御史大夫王沉為驃騎將軍博陵公司空
荀顛為臨淮公鎮北大將軍衛瓘為菑陽公其餘增
封進爵各有差文武普增位二等改景初曆為太始
曆臘以酉社以丑戊辰下詔大弘儉約出御府珠玉
玩好之物頒賜王公以下各有差置中軍將軍以統

宿衛七軍已巳詔陳留王載天子旌旗備五時副車
行魏正朔郊祀天地禮樂制度皆如魏舊上書不稱
臣賜山陽公劉康安樂公劉禪子示一人為駙馬都
尉乙亥以安平王孚為大宰假黃以大都督中外諸
軍事詔曰昔王凌謀廢主而王允不足以守位鄧
艾雖矜功失節然束手受罪今大以其家還使立後
興滅繼絕約法省刑除氏宗室示錮諸將吏遭三
年喪者遣寧終喪百姓其徭役示部曲將長吏以
下質任省郡國御調禁樂示戲之伎及雕文
游畋之具開直言之路置諫官以掌之是月鳳皇六

青龍三白龍二麒麟各一見于郡國

二年春正月景戌遣兼侍中侯史光等持節四方循省風俗除襍祝之不在祀典者丁亥有司請建七廟帝重其役不許庚寅罷雞鳴歌辛丑尊景皇帝夫人羊氏曰景皇后宮曰弘訓景午立皇后楊氏二月除漢宗室禁錮巳未常山王衡薨詔曰五等之封皆錄舊勲本爲縣侯者傳封次子爲亭侯爲鄉侯爲關內侯亭侯爲關中侯皆食本戶十分之一丁丑郊祀宣皇帝以配天宗祀文皇帝於明堂以配上帝庚午詔曰古者百官官箴王闕然保氏特以諫諍爲職今之

侍中常侍實處此位擇其能正色弼違匡救不逮者以兼此選三月戊戌吳人來弔祭有司奏爲答詔帝曰昔漢文光武懷撫尉佗公孫述皆未正君臣之儀所以羈縻未賓也皓遣使之始未知國慶但以書答之夏五月戊辰詔曰陳留王操尚謙沖每事輒表非所以優崇之也主者喻意非大事皆使王官表上之壬子驃騎將軍博陵公王沉卒六月壬申濟南王遂薨秋七月辛巳營太廟致荆山之木采華山之石鑄銅柱十二塗以黃金鏤以百物綴以明珠戊戌譙王遜薨景午晦日有食之八月景辰省右將軍宮初帝

國子監刑
雖從漢魏之制既葬除服而深衣素冠降席撤膳哀
敬如喪者戊辰有司奏改服進膳不許遂禮終而後
復吉及太后之喪亦如之九月乙未散騎常侍皇甫
陶傳玄領諫官上書諫諍有司奏請寢之詔曰凡關
言人主人臣所至難而苦不能聽納自古忠臣直士
之所慷慨也每陳事出侍主者多從深刻乃云恩貸
當由主上是何言乎其詳評議戊戌有司奏大晉繼
三皇之蹤蹈舜禹之跡應天順時受禪有魏宜一用
前代正朔服色皆如虞遵唐故事奏可冬十月景午
朔日有食之丁未詔曰昔舜葬蒼梧農不易畝禹葬

成紀市不改肆上惟祖考清簡之旨所徙陵十里內
居人動爲煩擾一切停之十一月己卯倭人來獻方
物并園丘方丘於南北郊二至之祀合於二郊罷山
陽公國督軍除其禁制己丑追尊景帝夫人夏侯氏
爲景懷皇后辛卯遷祖禰神主于太廟十二月罷農
官爲郡縣是歲鳳皇六青龍十黃龍九騏麟各一見
于郡國

三年春正月癸丑白龍二見于弘農澠池丁卯立皇
子衷爲皇太子詔曰朕以不德託于四海之上兢兢
祇畏懼無以康濟寓內思與天下式明玉度正本清

國子監刊
源於置胤樹嫡非所先務又近世每建太子寬宥施
惠之事問不獲已順從王公卿士之議耳方今世運
垂平將陳之以德義示之以好惡使百姓蠲多幸之
慮篤終始之行曲惠小仁故無取焉咸使知聞三月
戊寅初令二千石得終三年喪丁未晝昏罷武衛將
軍官以李熹爲太子太傅太山石崩夏四月戊午張
掖太守焦勝上言氐池縣大柳谷口有玄石一所白
畫成文實大晉之休祥圖之以獻詔以制幣告于太
廟歲之天府秋八月罷都護將軍以其五署還光祿
勲九月甲申詔曰古者以德詔爵以庸制祿雖下士

猶食上農外足以奉公忘私內足以養親施惠今在
位者祿不代耕非所以崇化之本也其議增吏俸賜
王公以下帛各有差以太尉何曾爲太保義陽王望
爲太尉司空荀顛爲司徒冬十月聽士卒遭父母喪
者非在疆場皆得奔赴十二月徙宗聖侯孔震爲奉
聖亭侯山陽公劉康來朝禁星氣讖緯之學

四年春正月辛未以尚書令裴秀爲司空景戌律令
成封爵賜帛各有差有星孛於軫丁亥帝耕於藉田
戊子詔曰古設象刑而衆不犯今雖叅夷而姦不絕
何德刑相去之遠哉先帝深愍黎元哀矜庶獄乃命

羣后考正典刑朕守遺業永惟保乂皇基思與萬國以無爲爲政方今陽春養物東作始興朕親率王公卿士耕籍田千畝又律令旣就班之天下將以簡法務本惠育海內宜寬有罪使得自新其大赦天下長吏郡丞長史各賜馬一匹二月庚子增置山陽公國相郎中令陵令雜工宰人鼓吹車馬各有差罷中軍將軍置北軍中候官甲寅以東海劉儉有至行拜爲郎以中軍將軍羊祜爲尚書左僕射東莞王伷爲尚書右僕射三月戊子皇太后王氏崩夏四月戊戌太保睢陵公王祥薨己亥祔葬文明皇后王氏於崇陽

陵罷振威揚威護軍官置左右積弩將軍六月甲申朔詔曰郡國守相三載一巡行屬縣必以春此古者所以述職宣風展義也見長吏觀風俗協禮律考度量存問耆老親見百年錄囚徒理冤枉詳察政刑得失知百姓所患苦無有遠近便若朕親臨之敦喻五教勸務農功勉勵學者思勤正典無爲百家庸末致遠必泥土庶有好學篤道孝弟忠信清白異行者舉而進之有不孝敬於父母不長悌於族黨悖禮棄常不率法令者糾而罪之田疇闢生業修禮教設禁令行則長吏之能也人窮匱農事荒姦盜起刑獄煩下

陵上替禮義不興斯長吏之否也若長吏在官公廉
慮不及私正色直節不飾名譽者及身行貪穢諂黷
求容公節不立而私門日富者並謹察之揚清激濁
舉善彈違此朕所以垂拱總綱責成於良二千石也
於戲戒哉秋七月太山石崩衆星西流戊午遣使者
侯史光循行天下巳卯謁崇陽陵九月青徐兗豫四
州大水伊洛溢合於河開倉以振之詔曰雖詔有所
欲及奏得可而於事不便者皆不可隱情冬十月吳
將施績入江夏萬郁寇襄陽遣太尉義陽王望屯龍
陂荊州刺史胡烈擊敗郁吳將顧容寇鬱林太守毛

昺大破之斬其交州刺史劉俊將軍脩則十一月吳
將丁奉等出芍陂安東將軍汝陰王駿與義陽王望
擊走之巳未詔王公卿尹及郡國守相舉賢良方正
直言之士十二月班五條詔書於郡國一曰正身二
曰勤百姓三曰撫孤寡四曰敦本息末五曰去人事
庚寅帝臨聽訟觀錄廷尉洛陽獄囚親平決焉扶南
林邑各遣使來獻

五年春正月癸巳申戒郡國計吏守相令長務盡地
利禁游食商販景申帝臨聽訟觀錄囚徒多所原遣
青龍二見於滎陽二月以雍州隴右五郡及涼州之

金城梁州之陽平置秦州辛巳白龍二見於趙國青
徐兗三州水遣使振恤之壬寅以尚書左僕射羊祜
都督荊州諸軍事征東大將軍衛瓘都督青州諸軍
事東莞王佃鎮東大將軍都督徐州諸軍事丁亥詔
曰古者歲書群吏之能否三年而誅賞之諸令史前
後但簡遺踈劣而無有勸進非黜陟之謂也其條勤
能有稱尤異者歲以爲常吾將議其功勞巳未詔蜀
相諸葛亮孫京隨才署史夏四月地震五月辛卯朔
鳳皇見于趙國曲赦交趾九真日南五歲刑六月鄴
美官督郭廙上疏陳五事以諫言甚切直擢爲屯留

令西平人麴路伐登聞鼓言多祲謗有司奏棄市帝
曰朕之過也捨而不問罷鎮軍將軍復置左右將軍
官秋七月延群公詢讜言九月有星孛于紫宮冬十
月景子以汲郡太守王宏有政績賜穀千斛十一月
追封謚皇弟兆爲城陽哀王以皇子景度嗣十二月
詔州郡舉勇猛秀異之才
六年春正月丁亥朔帝臨軒不設樂吳將丁奉入渦
口揚州刺史牽弘擊走之三月赦五歲刑巳下夏四
月白龍二見於東莞五月立壽安亭侯承爲南宮王
六月戊午秦州刺史胡烈擊叛虜於萬斛堆力戰死

之詔遣尚書石鑒行安西將軍都督秦州諸軍事與
奮威護軍田章討之秋七月丁酉復隴右五郡遇寇
害者租賦不能自存者廩貸之乙巳城陽王景度薨
詔曰自泰始以來大事皆撰錄秘書寫副後有其事
輒宜綴集以爲常丁未以汝陰王駿爲鎮西大將軍
都督雍涼二州諸軍事九月大宛獻汗血馬焉耆來
貢方物冬十一月辛辟雍行鄉飲酒之禮賜太常博
士帛牛酒各有差立皇子東爲汝南王十二月吳夏
口督前將軍孫秀帥衆來奔拜驃騎將軍開府儀同
三司封會稽公戊辰復置鎮軍官七年春正月景午

皇太子冠賜王公以下帛各有差匈奴帥劉猛叛出
塞三月孫皓帥衆趨壽陽遣大司馬望屯淮北以距
之三月景戌司空鉅鹿公裴秀薨癸巳以中護軍王
業爲尚書左僕射高陽王珪爲尚書右僕射孫秀部
將何崇帥衆五千人來降夏四月九真太守董元爲
吳將虞況所攻軍敗死之北地胡寇金城涼州刺史
牽弘討之群虜內叛圍弘於青山弘軍敗死之五月
立皇子憲爲城陽王雍涼秦三州飢赦其境內殊死
以下閏月大雩太官減膳詔交趾三郡南中諸郡無
出今年戶調六月詔公卿以下舉將帥各一人辛丑

大司馬義陽王望薨大雨霖伊洛河溢流居人四千餘家殺三百餘人有詔振貸給棺秋七月癸酉以車騎將軍賈充為都督秦涼二州諸軍事吳將陶璜等圍交趾太守楊稷與鬱林太守毛炅及日南等三郡降於吳八月景戌以征東大將軍衛瓘為征北大將軍都督幽州諸軍事景申城陽王憲薨分益州之南中四郡置寧州曲赦四郡殊死已下冬十月丁丑日有食之十一月丁己衛公姬署薨十二月大雪罷中領軍并北軍中候以光祿大夫鄭袤為司空

八年春正月監軍何植討匈奴劉猛屢破之左部帥

李恪殺猛而降癸亥帝耕于籍田二月乙亥禁彫文綺組非法之物壬辰太宰安平王孚薨詔內外群官舉任邊郡者各三人帝与右將軍皇甫陶論事陶与帝爭言散騎常侍鄭徽表請罪之帝曰讜言謬所望於左右也人主常以阿媚為患豈以爭臣為損哉徽越職妄奏豈朕之意遂免徽官夏四月置後將軍以備四軍六月益州牙門張弘誣其刺史皇甫晏反殺之傳首京師弘坐伏誅夷三族壬辰大赦景申詔復隴右四郡遇寇害者田租秋七月以車騎將軍賈充為司空九月吳西陵督步闡來降拜衛將軍開府儀

同三司封宜都公吳將陸抗攻闡遣車騎將軍羊祜
帥衆出江陵荊州刺史楊肇迎闡於西陵巴東監軍
徐胤擊建平以救闡冬十月辛未朔日有食之十二
月肇攻抗不克而還闡城陷爲抗所禽

九年春正月辛酉司空密陵侯鄭袤薨二月癸巳司
徒樂陵公石苞薨立安平亭侯隆爲安平王三月立
皇子祗爲東海王夏四月戊辰朔日有食之五月旱
以太保何曾領司徒六月乙未東海王祗薨秋七月
丁酉朔日有食之吳將魯淑圍弋陽征虜將軍王渾
擊敗之罷五官左右中郎將 訓太僕衛尉大長秋

寺官鮮卑寇廣寧殺略五千人詔聘公卿以下子女
以備六宮采擇未畢權禁斷婚姻冬十月辛巳制女
年十七父母不嫁者使長吏配之十一月丁酉臨宣
武觀大閱諸軍甲辰乃罷

十年春正月辛亥帝耕于藉田閏月癸酉太傅壽光
公鄭冲薨巳卯高陽王珪薨庚辰太原王瓌薨丁亥
詔曰嫡庶之別所以辨上下明貴賤而近世以來多
皆內寵登妃后之職亂尊卑之序自今以後皆不得
登用妾媵以爲嫡正二月分幽州五郡置平州三月
癸亥日有食之夏四月巳未太尉臨淮公荀顛薨六

月癸巳臨聽訟觀錄囚徒多所原遣是夏大蝗秋七月景寅皇后楊氏崩壬午吳平虜將軍孟泰偏將軍王嗣等帥衆降八月涼州虜寇金城諸郡鎮西將軍汝陰王駿討之斬其帥乞文泥等戊申葬元皇后于峻陽陵九月癸亥以大將軍陳騫爲太尉攻拔吳枳里城獲吳立信校尉莊祐吳將孫遵李承帥衆寇江夏太守嵇喜擊破之立河橋于富平津冬十一月立城東七里澗石橋庚午帝臨宣武觀大閱諸軍十二月有星孛于軫置藉曰今立太原王子緝爲高陽王吳威北將軍嚴聰揚威將軍嚴整偏將軍朱買來降

是歲鑿陝南山決河東注洛以通運漕

咸寧元年春正月戊午朔大赦改元二月以將士應已娶者多家有五女者給復辛酉以故鄴令夏謨有清稱賜穀百斛以奉祿薄賜公卿以下帛有差叛虜樹機能送質請降夏五月下邳廣陵大風拔木壞廬舍六月鮮卑力微遣子來獻吳人寇江夏西域戊巳校尉馬循討叛鮮卑破之斬其渠帥戊申置太子詹事官秋七月甲申晦日有食之郡國螟八月壬寅沛王子文薨以故太傅鄭冲太尉荀顛司徒石苞司空裴秀驃騎將軍王沉安平獻王孚等及太保何曾司

空賈充太尉陳騫中書監荀勗平南將軍羊祜齊王攸等皆列於銘饗九月甲子青州螟徐州大水冬十月乙酉常山王殷薨癸巳彭城王權薨十一月癸亥大闕於宣武觀至于己巳十二月丁亥追尊宣帝廟曰高祖景帝曰世宗文帝曰太祖是月大疫洛陽死者大半封裴頠為鉅鹿公

二年春正月以疾疫廢朝賜諸散吏至于士卒綵各有差二月景戌河間王洪薨甲午赦五歲刑以下東夷八國歸化并州虜犯塞監并州諸軍事胡奮擊破之初燉煌太守尹瑒卒州以燉煌令梁澄領太守事議即令狐豐廢澄自領郡事豐死弟宏代之至是涼州刺史楊欣斬宏傳首洛陽先是帝不豫及瘳群臣上壽詔曰每念頃遇疫氣死亡為之愴然豈以一身之休息忘百姓之艱邪諸上禮者皆絕之夏五月鎮西大將軍汝陰王駿討北胡斬其渠帥吐敦立國子學庚午大雩六月癸丑薦荔枝于太廟甲戌有星孛于氏自春旱至于是月始雨吳京下督孫楷帥眾來降以為車騎將軍封丹陽侯白龍二見于新興井中秋七月有星孛于大角吳臨平湖自漢末壅塞至是自開父老相傳云此湖塞天下亂此湖開天下平癸

丑安平王隆薨東夷十七國內附河南魏郡暴水殺
百餘人詔給棺鮮卑阿羅多等寇邊西域戊巳校尉
馬循討之斬首四千餘級獲生九千餘人於是來降
八月庚辰河東平陽地震巳亥以太保何曾為太傅
太尉陳騫為大司馬司空賈充為太尉鎮東大將軍
齊王攸為司空有星孛于太微九月又孛于翼丁未
起太倉於城東常平倉於東西市閏月荊州五郡水
流四千餘家冬十月以汝陰王駿為征西大將軍平
南將軍羊祜為征南大將軍丁卯立皇后楊氏大赦
賜王公以下及于鰥寡各有差十一月白龍二見于

梁國十二月徵處士安定皇甫謐為太子中庶子封
后父鎮軍將軍楊駿為臨晉侯是月以平州刺史當
詢前廣平太守孟桓清白有聞詢賜帛二百匹桓百
匹

三年春正月景子朔日有食之立皇子裕為始平王
安平穆王隆弟敷為安平王詔曰宗室戚屬國之枝
葉欲令奉率德義為天下式然處富貴而能慎行者
寡召穆公糾合兄弟而賦棠棣之詩此姬氏所以本
枝百世也今以衛將軍扶風王亮為宗師所當施行
皆諮之於宗師也庚寅始平王裕薨有星孛於西方

使征北大將軍衛瓘討鮮卑力微三月平虜護軍文
淵討叛虜樹機能等破之有星孛于胃乙未帝將射
雉慮損麥苗而止夏五月戊子吳將軍凱夏祥帥衆
七千餘人來降六月益梁八郡水殺三百餘人沒邸
閣別倉秋七月以都督豫州諸軍事王渾為都督揚
州諸軍事中山王睦以罪廢為丹水侯八月癸亥徙
扶風王亮為汝南王東莞王休為琅邪王汝陰王駿
為扶風王琅邪王倫為趙王渤海王輔為太原王太
原王顥為河間王北海王陵為任城王陳王斌為西
河王汝南王柬為南陽王濟南王耽為中山王河間
王威為章武王立皇子瑋為始平王允為濮陽王該
為新都王遐為清河王鉅平侯羊祜為南城侯以汝
南王亮為鎮南大將軍大風拔樹暴寒且冰郡國五
隕霜傷穀九月戊子以左將軍胡奮為都督江北諸
軍事充豫徐青荆益梁七州大水傷秋稼詔振給之
立齊王子蕤為遼東王替為廣漢王冬十一月景戌
帝臨宣武觀大門至于壬辰十二月吳將孫慎入江
夏汝南略千餘家而去是歲西北雜虜及鮮卑匈奴
五溪蠻夷東夷國前後千餘輩各帥種人部落內附
四年春正月庚午朔日有食之三月甲申尚書左僕

射盧欽卒辛酉以尚書右僕射山濤為尚書左僕射
東夷六國來獻夏四月蚩尤旗見於東井六月丁未
陰平廣武地震甲子又震涼州刺史楊欣與虜若羅
拔能等戰于武威敗績死之弘訓皇后羊氏崩秋七
月己丑柩葬景獻皇后羊氏于峻平陵庚寅高陽王
緝薨癸巳范陽王綏薨荆楊郡國二十皆大水九月
以太傅何曾為太宰辛巳以尚書令李胤為司徒冬
十月以征北大將軍衛瓘為尚書令揚州刺史應綽
伐吳皖城斬首五千級焚穀米百八十萬斛十一月
辛巳太醫司馬程據獻雉頭裘帝以奇技異服典禮

所禁焚之於殿前甲申勅內外敢有犯者罪之吳昭
武將軍劉翻厲武將軍祖始來降辛卯以尚書杜預
都督荊州諸軍事征南大將軍羊祜卒十二月乙未
西河王斌薨丁未太宰朗陵公何曾薨是歲東夷九
國內附
五年春正月虜帥樹機能攻陷涼州乙丑使討虜護
軍武威太守馬隆擊之二月甲午白麟見于平原三
月匈奴都督拔奕虛帥部落歸化乙亥以百姓饑饉減
御膳之半有星孛于柳夏四月又孛于女御大赦降
除部曲督以下質任丁亥郡國八雨雹傷秋稼壞百

姓廬舍秋七月有星孛于紫宮九月甲午麟見于河
南冬十月戊寅匈奴餘渠都督獨雍等帥部落歸化
汲郡人不準掘魏襄王家得竹簡小篆古書十餘萬
言藏于秘府十一月大舉伐吳遣鎮軍將軍琅和王
佃出涂中安東將軍王渾出江西建威將軍王戎出
武昌平西將軍胡奮出夏口鎮南大將軍杜預出江
陵龍驤將軍王濬廣武將軍唐彬率巴蜀之卒浮江
而下東西凡二十餘萬以太尉賈充為大都督行冠
軍將軍楊濟為副摠統衆軍十二月馬隆擊叛虜樹
機能大破斬之涼州平肅慎來獻楛矢石罽

大康元年春正月己丑朔五色氣冠日癸丑王渾克
吳尋陽賴鄉諸城獲吳威武將軍周興二月戊午王
濬唐彬等剋丹陽城庚申又克西陵殺西陵都督鎮
軍將軍留憲征南將軍成璩西陵監鄭廣于戊濬又
克夷道樂鄉城殺夷道監陸晏水軍都督陸景甲戌
杜預克江陵斬吳江陵督王延平南將軍胡奮剋江
安於是諸軍並進樂鄉荆門諸戍相次來降乙亥以
濬為都督益梁二州諸軍事復下詔曰濬彬東下掃
除巴丘與胡奮王戎共平夏口武昌順流長驚直造
秣陵與奮戎審量其宜杜預當鎮靜零桂懷輯衡陽

大兵既過荊州南境固當傳檄而定預當分萬人給
濟七千給彬夏口既平奮宜以七千人給濟武昌既
了戎當以六千人增彬太尉克移屯項摠督諸方濟
進破夏口武昌遂泛舟東下所至皆平王渾周浚與
吳丞相張悌戰于版橋大敗之斬悌及其將孫震沈
瑩傳首洛陽孫皓窮蹙請降送璽綬於琅邪王由三
月壬申王濬以舟師至于建鄴之石頭孫皓大懼面
縛輿櫬降于軍門濬杖節解縛焚櫬送于京都收其
圖籍克州四郡四十三縣三百一十三戶五十二萬
三千吏三萬二千兵二十三萬男女口二百三十萬

其牧守已下皆因吳所置除其苛政示之簡易吳人
大悅乙酉大赦改元大酺五日恤孤老困窮夏四月
河東高平兩雹傷秋稼遣兼侍中張側黃門侍郎朱
震分使揚越慰其初附白麟見于頓丘三河魏郡弘
農兩雹傷宿麥五月辛亥封孫皓為歸命侯拜其大
子為中郎諸子為郎中吳之舊望隨才擢叙孫氏大
將戰亡之家徙於壽陽將吏渡江復十年百姓及百
工復二十年景寅帝臨軒大會引皓升殿群臣咸稱
萬歲丁卯薦酈涿酒于太廟郡國六雹傷秋稼庚午
詔諸士卒年六十以上罷歸于家庚辰以王濬為輔

晉書卷之三
國大將軍襄陽侯杜預當陽侯王戎安豐侯唐彬上
庸侯賈充琅和王佃以下增封於是論功行封賜公
卿以下帛各有差六月丁丑初置翊軍校尉官封丹
水侯睦為高陽王甲申東夷十國歸化秋七月虜軻
成泥寇西平浩豐殺督將以下三百餘人東夷二十
國朝獻庚寅以尚書魏舒為尚書右僕射八月車師
前部遣子入侍己未封皇弟延祚為樂平王白龍三
見于永昌九月群臣以天下一統屢請封禪帝謙讓
弗許冬十月丁巳除五女復十二月戊辰廣漢王贊
薨

二年春二月淮南丹陽地震三月景申安平王敦薨
賜王公以下吳生口各有差詔選孫皓妓妾五千人
入宮東夷五國朝獻夏六月東夷五國內附郡國十
六雨雹大風拔樹壞百姓廬舍江夏泰山水流居人
三百餘家秋七月上黨又暴風雨雹傷秋稼八月有
星孛于張冬十月鮮卑慕容廆寇昌黎十一月壬寅
大司馬陳騫薨有星孛于軒轅鮮卑寇遼西平州刺
史鮮于嬰討破之

三年春正月丁丑罷秦州并雍州甲午以尚書張華
都督幽州諸軍事三月安北將軍嚴詢敗鮮卑慕容

鹿於昌黎殺傷數萬人夏四月庚午太尉魯公賈充
薨閏月景子司徒廣陸侯李胤薨癸丑白龍二見于
濟南秋八月罷平州寧州刺史三年一入奏事九月
東夷二十九國歸化獻其方物吳故將莞恭帛奉舉
兵反攻害建鄴令遂圍揚州徐州刺史稽喜討平之
冬十二月甲申以司空齊王攸為大司馬督青州諸
軍事鎮東大將軍琅邪王佃為撫軍大將軍汝南王
亮為太尉光祿大夫山濤為司徒尚書令衛瓘為司
空景申詔四方水旱甚者無出田租
四年春正月甲申以尚書右僕射魏舒為尚書左僕
射下邳王晃為尚書右僕射戊午司徒山濤薨二月
己丑立長樂亭侯寔為北海王三月辛丑朔日有蝕
之癸丑大司馬齊王攸薨夏四月任城王陵薨五月
己亥大將軍琅邪王佃薨徙遼東王蕤為東萊王六
月增九卿禮秩牂柯獠二千餘落內屬秋七月壬子
以尚書右僕射下邳王晃為都督青州諸軍事景寅
兖州大水復其田租八月鄆善國遣子入侍假其歸
義侯以隴西王泰為尚書右僕射冬十一月戊午新
都王該薨以尚書左僕射魏舒為司徒十二月庚午
大閱于宣武觀是歲河南及荊州揚州大水

晉帝紀三
五年春正月己亥青龍一見于武庫井中二月景寅
立南宮王子玷為長樂王壬辰地震夏四月任城魯
國池水赤如血五月景午宣帝廟梁折六月初置黃
沙獄秋七月戊申皇子恢薨任城梁國中山雨雹傷
秋稼減天下戶課三分之一九月南安大風折木郡
國五大水隕霜傷秋稼冬十一月甲辰太原王輔薨
十二月庚午大赦林邑大秦國各遣使來獻閏月鎮
南大將軍當陽侯杜預卒

六年春正月庚申朔以比歲不登免租貸宿負戊辰
以征南大將軍王渾為尚書左僕射尚書褚契都督
揚州諸軍事楊濟都督荊州諸軍事二月郡國六隕
霜傷桑麥夏四月扶南等十國來獻參離四千餘落
內附郡國四旱十大水壞百姓廬舍秋七月巴西地
震八月景戌朔日有食之減百姓繇絹三分之一白
龍見于京兆以鎮軍大將軍王濬為撫軍大將軍九
月景子山陽公劉康薨冬十月南安山崩水出南陽
郡獲兩足獸龜茲焉者國遣子入侍十二月甲申大
閱于宣武觀旬日而罷庚子撫軍大將軍襄陽侯王
濬卒

七年春正月甲寅朔日有食之乙卯詔曰比年災異

會帝紀三
五
屢發日蝕三朝地震山崩邦之不減實在朕躬公卿大臣各上封事極言其故勿有所諱夏五月郡國十三旱鮮卑慕容廆寇遼東秋七月朱提山崩捷為地震八月東夷十一國內附京兆地震九月戊寅驃騎將軍扶風王駿薨郡國八大水冬十一月壬子以隴西王泰都督關中諸軍事十二月遣侍御史巡遭水諸郡出後宮才人妓女以下二百七十人歸于家始制大臣聽終喪三年己亥河陰雨赤雪二頃是歲扶南等二十一國馬韓等十一國遣使來獻
四
八年春正月戊申朔日有食之太廟殿陷三月乙丑

臨商觀震夏四月齊國大水隕霜傷麥六月魯國大風拔樹木壞百姓廬舍郡國八大水秋七月前殿地陷深數丈中有破船八月東夷二國內附九月改營太廟冬十月南康平固縣吏李豐反聚眾攻郡縣自號將軍十一月海安令蕭輔聚眾反十二月吳興人蔣迪聚黨反圍陽羨縣州郡捕討皆伏誅南夷扶南西域康居國各遣使來獻是歲郡國五地震
夏四
九年春正月壬申朔日有食之詔曰興化之本由政平訟理也二千石長吏不能勤恤人隱而輕挾私故興長刑獄又多貪濁煩撓百姓其勅刺史二千石糾

其穢濁舉其公清有司議其黜陟令內外群官舉清能拔寒素江東四郡地震二月尚書右僕射陽夏侯胡奮卒以尚書朱整為尚書右僕射三月丁丑皇后親桑于西郊賜帛各有差壬辰初并二社為一夏四月江南郡國八地震隴西隕霜傷宿麥五月義陽王竒有罪黜為三縱亭侯詔內外群官舉守令之才六月庚子朔日有食之徙章武王威為義陽王郡國三十二大旱傷麥秋八月壬子星隕如雨詔郡國五歲刑以下決遣無留庶獄九月東夷七國詣校尉內附郡國二十四螟冬十二月癸卯立河間平王洪子英為章武王戊申青龍黃龍各一見于魯國

十年夏四月以京兆太守劉霄陽平太守梁柳有政績各賜穀千斛郡國八隕霜太廟成乙巳遷神主于新廟帝迎于道左遂祫祭大赦文武增位一等作廟者二等丁未尚書右僕射廣興侯朱整卒祭丑崇聖殿災五月鮮卑慕容廆來降東夷十一國內附六月庚子山陽公劉瑾薨復置二社冬十月壬子徙南宮王承為武邑王十一月景辰守尚書令左光祿大夫荀勗卒帝疾瘳賜王公以下帛有差含章殿鞠室火甲申以汝南王亮為大司馬大都督假黃鉞改封南

陽王東爲秦王始平王瑋爲楚王濮陽王允爲淮南王並假節之國各統方州軍事立皇子父爲長沙王頴爲成都王晏爲吳王熾爲豫章王演爲代王皇孫適爲廣陵王立濮陽王子迪爲漢王始平王子儀爲毗陵王汝南王次子羨爲西陽公徙扶風王暢爲順陽王暢弟歆爲新野公琅邪王覲弟澹爲東武公繇爲東安公灌爲廣陵公卷爲東莞公改諸王國相爲內史十二月庚寅大廟梁折是歲東夷絕遠三十餘國西南夷二十餘國來獻虜壬戌奚軻男女十萬口來降

太熙元年春正月辛酉朔改元己巳以尚書左僕射王渾爲司徒司空衛瓘爲太保二月辛丑東夷七國朝貢琅邪王覲薨三月甲子以右光祿大夫石鑿爲司空夏四月辛丑以侍中車騎將軍楊駿爲太尉都督中外諸軍錄尚書事己酉帝崩于含章殿時年五十五葬峻陽陵廟號世祖帝宇量弘厚造次必於仁恕容納謹正未嘗失色於人明達善謀能斷大事故得撫寧萬國綏靜四方承魏氏奢侈刻弊之後百姓思古之遺風乃厲以恭儉敦以寡慾有司嘗奏御牛青絲紉斷詔以青麻代之臨朝寬裕法度有恒高陽

許允既爲文帝所殺允子竒爲太常丞帝將有事於太廟朝議以竒受害之門不欲接近左右請出爲長史帝乃追述允夙望稱竒之才擢爲祠部郎時論稱其夷曠平吳之後天下乂安遂怠於政術耽於遊宴寵愛后黨親貴當權舊臣不得專任彝章紊廢請謁行矣爰至末年知惠帝弗克負荷然恃皇孫聰睿故無廢立之心復慮非賈后所生終致危敗遂與腹心共圖後事說者紛然久而不定竟用王佑之謀遣太子母弟秦王東都督關中楚王瑋淮南王允並鎮守要害以彊帝室又恐楊氏之偏復以佑爲北軍中候以典禁兵既而寢疾弥留至于大漸佐命元勳皆已先沒群臣惶惑計無所從會帝小差有詔以汝南王亮輔政又欲令朝士之有名望年少者數人佐之楊駿秘而不宣帝復尋至迷亂楊后輒爲詔以駿輔政促亮進發帝尋小間問汝南王來未意欲見之有所付託左右荅言未至帝遂困篤中朝之亂實始于斯矣制曰武皇承基誕膺天命握圖御宇敷化導民以佚代勞以治易亂絕縑綸之貢去雕琢之飾制奢俗以變儉約止澆風而反淳朴雅好直言留心采擢劉毅裴楷以質直見容嵇紹許竒雖仇讎不棄仁以御物

寬而得衆宏略大度有帝王之量焉於時民和俗靜
家給人足聿脩武用思啓封疆決神筭於深衷斷雄
圖於議表馬隆西伐王濟南征師不延時僊虜削迹
兵無血刃楊越為墟通上代之不通服前王之未服
禎祥顯應風教肅清天人之功成矣霸王之業大矣
雖登封之禮諱而不為驕泰之心因斯以起見土地
之廣謂萬葉而無虞觀天下之安謂千年而永治不
知處廣以思狹則廣可長廣居治而忘危則治無常
治加之建立非所委寄失才志欲就於亦平行先迎
於禍亂是猶將造越者指沙漠以遵途欲登山者涉
舟航而覓路所趨逾遠所尚轉難南北倍殊高下相
反求其至也不亦難乎况以新習易動之基而無久
安難拔之慮故賈充凶豎懷奸志以擁權楊駿豺狼
苞禍心以專輔及乎宮車晚出諒闇未周藩翰變親
以成踈連兵競滅其本棟梁回忠而起偽擁衆各舉
其威曾未數年綱紀大亂海內版蕩宗廟播遷帝道
王猷反居文身之俗神州赤縣翻成被髮之鄉棄所
大以資人掩其小而自託為天下笑其故何哉良由
失慎於前所以貽患於後且知子者賢父知臣者明
君子不肖則家亡臣不忠則國亂國亂不可以安也

家亡不可以全也是以君子防其始聖人閑其端而世祖惑荀勗之奸謀迷王渾之偽策心屢移於衆口事不定於已蓄元海當除而不除卒令擾亂區夏惠帝可廢而不廢終使傾覆洪基夫全一人者德之輕拯天下者功之重棄一子者忍之小安社稷者孝之大况乎資三世而成業延二孽以喪之所謂取輕德而捨重功畏小忍而忘大孝聖賢之道豈若斯乎雖則善始於初而乖令終於末所以殷勤史策不能無慷慨焉

帝紀第三

晉書三

帝紀第四

晉書四

唐太宗文皇帝

御撰

惠帝

孝惠皇帝諱秉字正度武帝第二子也泰始三年立為皇太子時年九歲太熙元年四月巳酉武帝崩是日皇太子即皇帝位太赦改元為永熙尊皇后楊氏曰皇太后立妃賈氏為皇后夏五月辛未葬武皇帝於峻陽陵景子增天下位一等預喪事者二等復租調一年二千石巳上皆封關中侯以太尉楊駿為太傅輔政秋八月壬午立廣陵王遹為皇太子以中書

監何劭為太子太師吏部尚書王戎為太子太傅衛將軍楊濟為太子太保遣南中郎將石崇射聲校尉胡齊長水校尉趙俊揚烈將軍趙歡將屯兵四出冬十月辛酉以司空石鑒為太尉前鎮西將軍隴西王泰為司空永平元年春正月乙酉朔臨朝不設樂詔曰朕夙遭不造淹恤在疚賴祖宗遺靈宰輔忠賢得以眇身託于群后之上昧於大道不明于訓戰戰兢兢夕惕若厲乃者哀迷之際三事股肱惟社稷之重率遵翼室之典猶欲長奉先皇之制是以有永熙之號然日月踰邁已涉新年開元易紀禮之舊章其改永熙二年

為永平元年又詔子弟及郡官並不得謁陵景午皇太子冠丁未見于太廟二月甲寅賜王公已下帛各有差癸酉鎮南將軍楚王瑋鎮東將軍淮南王元來朝戊寅復置秘書監官三月辛卯誅大傅楊駿駿弟衛將軍瑤太子太保濟中護軍張劭散騎常侍段廣楊邈左將軍劉預河南尹李斌中書令蔣俊東夷校尉文淑尚書武茂皆夷三族壬辰大赦改元賈后矯詔廢皇太后為庶人徙于金墉城告于天地宗廟誅太后母龐氏壬寅徵大司馬汝南王亮為太宰與太保衛瓘輔政以秦王東為大將軍東平王楙為撫軍

大將軍鎮南將軍楚王瑋為衛將軍領北軍中候下
邳王晃為尚書令東安公繇為尚書左僕射進封東
安王督將侯者千八十一人庚戌免東安王繇及東
平王綝繇徙帶方夏四月癸亥以征東將軍梁王彤
為征西大將軍都督關西諸軍事太子少傅阮垣為
平東將軍監青徐二州諸軍事己巳以太子太傅王
戎為尚書右僕射五月甲戌毗陵王軌薨壬午除天
下戶調繇絹賜孝悌高年鰥寡力田者帛人三匹六
月賈后矯詔使楚王瑋殺太宰汝南王亮太保留陽
公衛瓘乙丑以瑋擅害亮瓘殺之曲赦洛陽以廣陵

王師劉寔為太子太保司空隴西王泰錄尚書事秋
七月分揚州荊州十郡為江州八月庚申以趙王倫
為征東將軍都督徐兗二州諸軍事河間王顥為北
中郎將鎮鄴太子太師何劭為都督豫州諸軍事鎮
許昌徙長沙王乂為常山王己巳進西陽公羨爵為
王辛未立隴西世子越為東海王九月甲午大將軍
秦王柬薨辛丑徵征西大將軍梁王彤為衛將軍錄
尚書事以趙王倫為征西大將軍都督雍梁二州諸
軍事冬十二月辛酉京師地震是歲東夷十七國南
夷二十四部並詣校尉內附

二年春二月巳酉賈后殺皇太后于金墉城秋八月
壬子大赦九月乙酉中山王耽薨冬十一月大疫是
歲沛國雨雹傷麥

三年夏四月滎陽雨雹六月弘農郡雨雹深二尺冬
十月太原王泓薨

四年春正月丁酉朔侍中太尉安昌公石鑒薨夏五
月蜀郡山移淮南壽春洪水出山崩地陷壞城府及

百姓廬舍匈奴郝散反攻上黨殺長吏六月壽春地
大震死者一十餘家上庸郡山崩殺二十餘人秋八

月郝散帥衆降馮翊都尉殺之上谷居庸上庸並
陷裂冰泉涌出人有死者大飢九月景辰殺諸州之

遭地灾者甲午狂矢東北竟天是歲京師及郡國八
地震

五年夏四月彗星見于西方孛于奎至軒轅六月金
城地震東海雨雹深五寸秋七月下邳暴風壞廬舍

九月鴈門新興太原上黨大風傷禾稼冬十月武庫
火焚累代之寶十二月景戌新作武庫大調兵器丹

陽雨雹有石生于京師宜年里是歲荆揚兗豫青徐
等六州大水詔遣御史巡行振貸

六年春正月大赦司空下邳王晃薨以中書監張華

為司空太尉隴西王泰為尚書令衛將軍梁王彤為太子太保丁丑地震三月東海隕霜傷桑麥彭城呂縣有流血東西百餘步夏四月大風五月荆揚二州大水匈奴郝散弟度元帥馮翊北地馬蘭羗盧水胡反攻北地太守張損死之馮翊太守歐陽建與度元戰建敗績徵征西大將軍趙王倫為車騎將軍以太子太保梁王彤為征西大將軍都督雍梁二州諸軍事鎮關中秋八月雍州刺史解系又為度元所破秦雍氏羗悉叛推氏帥齊萬年僭號稱帝圍涇陽冬十月乙未山赦雍涼二州十一月景子遣安西將軍夏侯俊建威將軍周處等討萬年梁王彤屯好畤關中饑大疫

七年春正月癸丑周處及齊萬年戰於六陌王師敗績處死之夏五月魯國雨雹秋七月雍梁州疫大旱隕霜殺秋稼關中饑米斛萬錢詔骨肉相賣者不禁丁丑司徒京陵公王渾薨九月以尚書右僕射王戎為司徒太子太師何劭為尚書左僕射八年春正月景辰地震詔發倉廩振雍州饑人三月壬戌大赦夏五月郊禘石磬為二秋九月荆豫揚徐冀等五州大水雍州有年

九年春正月左積弩將軍孟觀伐氏戰于中亭大破之獲齊萬年徵征西大將軍梁王彤錄尚書事以北中郎將河間王顥為鎮西將軍鎮西將軍鎮關中城都王頴為鎮北大將軍鎮夏四月鄴人張承基等妖言署置聚黨數千郡縣逮捕皆伏誅六月戊戌太尉隴西王泰薨秋八月以尚書裴頌為尚書僕射冬十一月甲子朔日有蝕之京師大風發屋折木十二月壬戌廢皇太子適為庶人及其三子幽于金墉城殺太子母謝氏

末康元年春正月癸亥朔大赦改元己卯日有食之景子皇孫霖卒二月丁酉大風飛沙拔木三月尉氏雨血妖星見于南方癸未賈后矯詔害庶人適于許昌夏四月辛卯日有蝕之癸巳梁王彤趙王倫矯詔廢賈后為庶人司空張華尚書僕射裴頌皆遇害侍中賈謐及黨與數十人皆伏誅甲午倫矯詔大赦自為相國都督中外諸軍如宣文輔魏故事追復故皇太子位丁酉以梁王彤為太宰左光祿大夫何劭為司徒右光祿大夫劉寔為司空淮南王允為驃騎將軍己亥趙王倫矯詔害賈庶人于金墉城五月己巳立皇孫臧為皇太孫尚為襄陽王六月壬寅葬愍懷

太子于顯平陵撫軍將軍清河王暹薨癸卯震崇陽
陵標秋八月淮南王允舉兵討趙王倫不剋允及其
二子秦王郁漢王迪皆遇害曲赦洛陽平東將軍彭
城王植薨改封吳王晏為賓徒縣王以齊王冏為平
東將軍鎮許昌光祿大夫陳準為太尉錄尚書事九
月改司徒為丞相以梁王彤為之冬十月黃霧四塞
十一月戊午大風飛砂石六日乃止甲子立皇后羊
氏大赦大酺三日十二月彗星見于東方益州刺史
趙廞與洛陽流人李庠害城都內史耿勝捷為太守
李密汶山太守霍固西夷校尉陳摠據成都反永寧
元年春正月乙亥趙王倫篡帝位景寅遷帝于金墉
城號曰太上皇改金墉曰永昌宮廢皇太孫減為濮
陽王五星經天縱橫無常癸酉倫害濮陽王滅略陽
流人李特殺趙廞傳首京師三月平東將軍齊王冏
起兵以討倫傳檄州郡屯于陽翟征北大將軍成都
王穎征西大將軍河間王顥常山王又豫州刺史李
毅兗州刺史王彥南中郎將新野公歆皆舉兵應之
衆數十萬倫遣其將閻和出伊闕張泓孫輔出堽坂
以距冏孫會士猗許超出黃橋以距穎及穎將趙驤
石超戰於溴水會等大敗棄軍走閻月景戌朔日有

蝕之夏四月歲星晝見罔將何勛盧播擊張泓於揚

大破之斬孫輔等辛酉左衛將軍王與尚書淮陵

王漼勒兵入宮禽倫黨孫秀孫會許超士猗駱休等

皆斬之遂倫歸第即日乘輿反正群臣頓首謝罪帝

曰非諸卿之過也癸亥詔曰朕以不德纂承皇統遠

不能光濟大業靖綏四方近不能開明刑威式遏奸

宄至使逆臣孫秀敢肆凶虐窺間王室遂奉趙王倫

饗挾天位鎮東大將軍齊王罔征北大將軍成都王

穎征西大將軍河間王顥並以明德茂親忠規允著

首建大策匡救國難尚書漼共立大謀左衛將軍王

與與羣公卿士協同謀略親勒本營斬秀及其二子

前趙王倫為秀所誤與其子等已詣金墉迎朕幽宮

旋軫闔闔豈在于一人獨饗其慶宗廟社稷實有賴

焉於是大赦改元孤寡賜穀五斛大酺五日誅趙王

倫義陽王威九門侯質等及倫之黨與五月立襄陽

正尚為皇太孫六月戊辰大赦增吏位二等復封賓

徒王晏為吳王庚午東萊王蕤左衛將軍王與謀廢

齊王罔事泄蕤廢為庶人與伏誅夷三族甲戌以齊

王罔為大司馬都督中外諸軍事成都王穎為大將

軍錄尚書事河間王顥為太尉罷丞相復置司徒官

已卯以梁王彤爲太宰領司徒封齊王罔功臣葛旗
丰平公路季小黃公衛毅平陰公劉真安鄉公韓泰
封丘公秋七月甲午立吳王晏子國爲漢王復封常
山王乂爲長沙王八月大赦戊辰原徙邊者益州刺
史羅尚討羌破之已巳徙南平王祥爲宜都王下邳
王蕤薨以東平王懋爲平東將軍都督徐州諸軍事
九月追東平王繇復其爵丁丑封楚王瑋子範爲襄
陽王冬十月流人李特反於蜀十二月司空何劭薨
封齊王罔子冰爲樂安王英爲濟陽王超爲淮南王
是歲郡國十二旱六蝗太安元年春正月庚子安東

將軍譙王儉薨三月癸卯赦司冀苑豫四州皇太孫
尚薨夏四月慧星晝見五月乙酉侍中太宰領司徒
梁王彤薨以右光祿大夫劉寔爲太傅太尉河間王
顥遣將衙博擊李特於蜀爲特所敗遂陷梓潼巴西
害廣漢太守張微自號大將軍癸卯以清河王遐子
覃爲皇太子賜孤寡帛大酺五日以齊王罔爲太師
東海王越爲司空秋七月苑豫徐冀等四州大水冬十
月地震十二月丁卯河間王顥表齊王罔窺伺神器
有無君之心與成都王穎新野王歆范陽王虓同會
洛陽請廢罔還第長沙王乂奉乘輿屯南止車門攻

罔殺之幽其諸子于金墉城廢罔弟北海王寔大赦
改元以長沙王乂爲太尉都督中外諸軍事封東萊
侯蕤子炤爲齊王

二年春正月甲子朔赦五歲刑三月李特攻陷益州
荊州刺史宋岱擊特斬之傳首京師夏四月特子雄
復據益州五月義陽蠻張昌舉兵反以山都人丘沉
爲主改姓劉氏僞號漢建元神鳳攻破郡縣南陽太
守劉彬平南將軍羊尹鎮南大將軍新野王歆並遇
害六月遣荊州刺史劉弘等討張昌于方城王師敗
績秋七月中書令卞粹侍中馮孫河南尹李含等貳

於長沙王乂又疑而害之張昌陷江南諸郡武陵太
守賈隆零陵太守孔紘豫章太守閻濟武昌太守劉
根皆遇害昌別帥石冰寇揚州刺史陳徽與戰大敗
諸郡盡沒臨淮人封雲舉兵應之阜陵寇徐州八月
河間王顥成都王穎舉兵討長沙王乂帝以乂爲大
都督帥軍禦之庚申劉弘及張昌戰於清水斬之顥
遣其將張方穎遣其將陸機牽秀石超等來逼京師
乙丑帝幸十三里橋遣將軍皇甫商距方於宜陽巳
巳帝旋軍于宣武庚午舍于石樓天中裂無雲而雷
九月丁丑帝次于河橋壬午皇甫商爲張方所敗甲

申帝軍于芒山丁亥幸偃師辛卯舍于豆田癸巳尚書
右僕射興晉侯羊玄之奉帝旋于城東景申進軍緱
氏擊牽秀走之大赦張方入京城燒清明開陽二門
死者萬計石超逼乘輿于緱氏冬十月壬寅帝旋于
宮石超焚緱氏服御無遺丁未破牽秀范陽王虓于
東陽門外戊申破陸機于建春門石超走斬其大將
賈崇等十六人懸首銅駝街張方退屯十三里橋十
一月辛巳星晝隕聲如雷王師攻方壘不利方決千
金塢水碓皆涸乃發王公奴婢手舂給兵廩一品已
下不從征者男子十三以上皆從役又發奴助兵號

為四部司馬公私窮蹙米石萬錢詔命所至一城而
已壬寅夜赤氣竟天隱隱有聲景辰地震癸亥東海
王越執長沙王又幽於金墉城尋為張方所害甲子
大赦景寅揚州秀才周玘前南平內史王矩前吳興
內史顧秘起義軍以討石冰冰退自臨淮趣壽陽征
東將軍劉準遣廣陵度支陳敏擊冰李雄自郫城攻
益州刺史羅尚尚委城而退雄盡有成都之地封鮮
卑段勿塵為遼西公
永興元年春正月景午尚書令樂廣卒成都王穎自
鄴諷于帝乃大赦改元為永安帝逼於河間王顥密

詔雍州刺史劉洸秦州刺史皇甫重以討之況舉兵
攻長安為顓所敗張方大掠洛中還長安於是軍中
大餒人相食以成都王穎為丞相穎遣從事中郎盛
夔尋以兵五萬屯十二城門殿中宿所忌者穎皆殺
之以三部兵代宿衛二月乙酉廢皇后羊氏幽于金
墉城黜皇太子覃復為清河王三月陳敏攻石冰斬
之揚徐二州平河間王顓表請立成都王穎為太弟
戊申詔曰朕以不德纂承鴻緒于茲十有五載禍亂
滔天奸逆仍起至乃幽廢重宮宗廟圯絕成都王穎
溫仁惠和剋平暴亂其以穎為皇太弟都督中外諸
軍事丞相如故大赦賜鰥寡高年帛三匹大酺五日
景辰盜竊太廟服噐以太尉顓為太宰太傅劉寔為
太尉六月新作三城門秋七月景申朔右衛將軍陳
眎以詔召百寮入殿中曰勒兵討成都王穎戊戌大
赦復皇后羊氏及皇太子覃己亥司徒王戎東海王
越高密王簡平昌公模吳王晏豫章王熾襄陽王範
右僕射荀藩等奉帝北征至安陽衆十餘萬穎遣其
將石超距戰己未六軍敗績于蕩陰矢及乘輿百官
分散侍中嵇紹死之帝傷頰中三矢亡六軍帝遂幸
趙軍餒其趙進水左右奉秋桃趙遣弟熙奉帝之鄴

穎帥群官迎謁道左帝下輿涕泣其夕幸于穎軍穎
府有九錫之儀陳留王送貂蟬文衣鷩尾明日乃備
法駕幸于鄴唯豫章王熾司徒王戎僕射荀藩從庚
申大赦改元為建武八月戊辰穎殺東安王繇張方
復入洛陽廢皇后羊氏及皇太子章匈奴左賢王劉
元海反於離石自號大單于安北將軍王浚遣烏丸
騎攻成都王穎于鄴大敗之穎與帝單車走洛陽服
御分散倉卒上下無齋侍中黃門被囊中齋私錢三
千詔貸用所在買飯以供宮人止食於道中客舍宮
人有持升餘糲米飯及燥蒜鹽豉以進帝帝取之御

中黃門布被次獲嘉市麩米飯盛以瓦盆帝噉兩盂
有老父獻蒸鷄帝受之至温將謁陵帝喪屣納從者
之履下拜流涕左右皆歔歔及濟河張方帥騎三千
以陽燧青蓋車奉迎方拜謁帝躬止之幸已大赦賞
從者各有差冬十一月乙未方請帝謁廟曰劫帝幸
長安方以所乘車入殿中帝馳避後園竹中方逼帝
升車左右中黃門鼓吹十二人步從唯中書監盧志
侍側方以帝幸其壘帝令方具車載宮人寶物軍人
曰虞略後宮分爭府藏魏晉已來之積掃地無遺矣
行次新安寒甚帝墮馬傷足尚書高光進面衣帝嘉

之河間王顥帥官屬步騎三萬迎于霸上顥前拜謁
帝下車止之以征西府為宮唯僕射荀藩司隸劉暉
太常鄭球河南尹周馥與其遺官在洛陽為留臺承
制行事號為東西臺焉景午留臺大赦改元復為永
安辛丑復皇后羊氏李雄僭號成都王劉元海僭號
漢王十二月下亥詔曰天禍晉邦象嗣莫繼成都王
穎自在儲貳政績虧損四海失望不可承重其以王
還弟豫章王熾先帝愛子令聞日新四海注意今以
為皇太弟以降我晉邦以司空越為太傅与太宰顥
夾輔朕躬司徒王戎叅錄朝政光祿大夫王衍為尚

書左僕射安南將軍虓安北將軍濬平北將軍騰各
守本鎮高密王簡為鎮南將軍領司隸校尉權鎮洛
陽東中郎將模為寧北將軍都督冀州鎮于鄴鎮南
大將軍劉弘領荊州以鎮南土周馥繆胤各還本部
百官皆復職齊王冏前應還弟長沙王乂輕陷重刑
封其子紹為樂平縣王以奉其嗣自頃戎車屢征勞
費人力供御之物皆減三分之二戶調田租三分減
一蠲除苛政愛人務本清通之後當還東京大赦改元
以河間王都督中外諸軍事

二年春正月甲午朔帝在長安夏四月詔封樂平王

晉書卷四
紹為齊王景子張方廢皇后羊氏六月甲子侍中司徒安豐侯王戎薨隴西太守韓稚攻秦州刺史張輔殺之李雄僭即帝位國號蜀秋七月甲午尚書諸曹火燒崇禮闈東海王越嚴兵徐方將西迎大駕成都王穎部將公師藩等聚衆攻陷郡縣害陽平太守李志汲郡太守張延等轉攻鄴平昌公模遣將軍趙驤擊破之八月辛丑大赦驃騎將軍范陽王虓逐冀州刺史李義揚州刺史曹武殺卅陽太守朱建李雄遣其將李驤寇漢安車騎大將軍劉弘逐平南將軍彭城王釋于死九月庚寅胡公師藩又害平原太守王

景清河太守馮熊庚子豫州刺史劉喬攻范陽王虓於許昌敗之壬子以成都王穎為鎮軍大將軍都督河北諸軍事鎮鄴河間王顥遣將軍呂朗屯洛陽冬十月景子詔曰得豫州刺史劉喬檄稱穎川太守劉興迫脅驃騎將軍虓距逆詔令造構凶逆擅劫郡縣合聚兵衆擅用苟晞為兗州斷截王命鎮南大將軍荊州刺史劉弘平南將軍彭城王釋等其各勒所統逕會許昌與喬并力今遣右將軍張方為大都督統精卒十萬建武將軍呂朗廣武將軍騫羆建威將軍刁默等為軍前鋒共會許昌除興兄弟丁丑使前車

騎將軍石超北中郎將王闡討興等赤氣見于北方
東西竟天有星孛于北斗平昌公模遣將軍宋胄等
屯河橋十一月立節將軍周權詐被檄自稱平西將
軍復皇后羊氏洛陽令何喬攻權殺之復廢皇后十
二月呂朗等東屯滎陽成都王穎進據洛陽張方劉
弘等並按兵不能禦范陽王虓濟自官渡拔滎陽斬
石超襲許昌破劉喬於蕭喬奔南陽右將軍陳敏舉
兵反自號楚公矯稱被中詔從沔漢奉迎天子遂揚
州刺史劉機丹陽太守王曠遣弟恢南略江州刺史
應邈奔弋陽

光熙元年春正月戊子朔日有蝕之帝在長安河間
王顥聞劉喬破大懼遂殺張方請和於東海王越越
不聽宋胄等破穎將樓裒進逼洛陽穎奔長安甲子
越遣其將祁弘宋胄司馬纂等迎帝二月東萊愷令
劉柏根反自稱愷公襲臨淄高密王簡奔聊城王浚
遣將討柏根斬之夏四月己巳東海王越屯于溫顥
遣弘農太守彭隨北地太守刁默距祁弘等於湖五
月在矢西南流范陽國地燃可以爨壬辰祁弘等与
刁默戰默大敗顥穎走南山奔于宛弘等所部鮮卑
大掠長安殺二萬餘人是日日光四散赤如血甲午

又如之巳亥弘等奉帝還洛陽帝乘牛車行宮藉草
 公卿跋涉戊申驃騎范陽上虓殺司隸校尉邢喬巳
 酉盜取太廟金匱及策文各四六月景辰朔至自長
 安升舊殿哀感流涕謁于太廟復皇后羊氏辛未大
 赦改元秋七月乙酉朔日有食之太廟吏賈荀盜太
 廟靈衣及劔伏誅八月以太傅東海王越錄尚書驃
 騎將軍范陽王虓為司空九月穎丘太守馮嵩執成
 都王穎送之于鄴進東嬴公騰爵為東燕王平昌公
 模為南陽王冬十月司空范陽王虓薨虓長史劉輿
 害成都王穎十一月庚午帝崩于顯陽殿時年四十

八葬大陽陵帝之為太子也朝廷咸知不堪政事武
 帝亦疑焉嘗悉召東宮官屬使以尚書事令太子決
 之帝不能對賈妃遣左右代對多引古義給事張泓
 曰太子不學陛下所知今宜以事斷不可引書妃從
 之泓乃具草令帝書之武帝覽而大悅太子遂安及
 居大位政出群下綱紀大壞貨賂公行勢位之家以
 貴陵物忠賢路絕讒邪得志更相薦舉天下謂之互
 市焉高平王沉作釋時論南陽魯褒作錢神論廬江
 杜嵩作任子春秋皆疾時之作也帝又嘗在華林園
 聞蝦蟆聲謂左右曰此鳴者為官乎私乎或對曰在

官地為官在私地為私及天下荒亂百姓餓死帝曰何不食肉糜其蒙蔽皆此類也後曰食麩中毒而崩或云司馬越之鴆

史臣曰不才之子則天稱大權非帝出政迺宵人褒姒共叔帶並興襄后與大戎俱運昔者丹朱不肖赧王逃責相彼凶德事關休咎方乎土梗以墜其情源暑之氣將闡活毒之音罕記乃彰嗤笑用符顛隕豈通才俊彥猶形於前代增活助虐獨擅於當今者歟物號忠良於茲拔本人稱妖孽自此疏源長樂不祥承華非命生靈版蕩社稷丘墟古者敗國亡身分鑿

共軫不有亂常則多庸暗豈明神喪其精魄武皇不知其子也

贊曰惠皇居尊臨朝聽言厭體斯昧其情則昏高臺望子長夜奚寃金墉毀冕蕩陰釋胄及尔皆亡滔天來遘

帝紀第四

卷四

皇紀第五
唐太宗文皇帝
御撰

帝紀第五

晉書五

唐太宗文皇帝

御撰

孝懷帝

孝懷皇帝諱熾字豐度武帝第二十五子也太熙元年封豫章郡王屬孝惠之時宗室構禍帝冲素自守門絕賓游不交世事專玩史籍有譽於時初拜散騎常侍及趙王倫篡見收倫敗為射聲校尉累遷車騎大將軍都督青州諸軍事未之鎮未與元年改授鎮北大將軍都督鄴城守諸軍事十二月丁亥立為皇太子弟以清河王暉本太子也懼不敢當典書令盧陵

脩書曰二相經營王室志寧社稷儲貳之重且歸時
望親賢之舉非大王而誰清河幼弱未允衆心是以
既升東宮漢贊藩國今乘輿播越二宮久曠常恐氏
羞飲馬於涇川螳衆控弦於霸水宜及吉辰時登儲
副上翼大駕早寧東京下允黔首喁喁之望帝曰卿
吾之宋昌也乃從之惠之報宗室斷於此

光熙元年十一月庚午孝惠帝崩羊皇后以於太弟
為嫂不得為太后催清河王暉入已至尚書閣侍中
華混等急召太弟發西即皇帝位大赦尊皇太后羊氏
為惠皇后居弘訓宮追尊所生太妃王氏為皇太后

太妃梁氏為皇后十二月壬午朔日有食之己亥封
曲城王植子融為樂城縣王南陽王模殺河間王顓
於雍谷辛丑以中書監温羨為司徒尚書左僕射
行為司空己酉葬孝惠皇帝于太陽陵李雄別帥李
離寇梁州

永嘉元年春正月癸丑朔大赦改元除三族刑以太
傅東海王越輔政殺御史中丞諸葛政二月辛巳東
萊人王彌起兵反寇青徐二州長廣太守宋熙東平
太守龐仇並遇害三月己未朔平東將軍周馥斬送
陳敏首丁卯改葬武悼楊皇后庚午立豫章王詮為
正德十一年

皇太子幸示大赦庚辰東海王越出鎮許昌以征東
將軍高密三簡為征南大將軍都督荊州諸軍事鎮
驩改封安北將軍東燕王騰為新蔡王都督司冀二
州諸軍事鎮鄴以征南將軍南陽王模為征西大將
軍都督秦雍梁益四州諸軍事鎮長安并州諸郡為
劉元海所陷刺史劉琨獨保晉陽夏五月馬牧帥汲
桑聚眾反敗魏郡太守馮嵩遂陷鄴城害新蔡王騰
燒鄴宮火旬日不滅又殺前幽州刺史石勒於樂陵
入掠平原山陽公劉秋逼害洛陽步廣里地陷有二
鵝出色蒼蒼者冲天白者不能飛建寧郡夷攻陷

死者二千餘人秋七月己酉朔東海王越進屯官渡
以討汲桑己未以平東將軍琅琊王睿為安東將軍
都督揚州江南諸軍事假節鎮建鄴八月己卯朔撫
軍將軍苟晞敗汲桑於鄴甲辰曲赦幽并司冀兗豫
等六州分荊州江州八郡為湘州九月戊申苟晞又
破汲桑陷其九壘辛亥有大星如日小者如斗自西
方流於東北天盡赤俄有聲如雷始脩千金竭於許
昌以通運冬十一月戊申朔日有蝕之甲寅以尚書
右僕射和郁為征北將軍鎮鄴十二月戊寅并州人
田蘭薄盛等斬汲桑於樂陵甲午以前太傅劉寔為

太尉庾子以光祿大夫延陵公高光爲尚書令東海
王越矯詔囚清河王暉于金墉城癸卯越自爲丞相
以撫軍將軍荀晞爲征東大將軍甲寅以尚書
二年春正月景子朔日有蝕之丁未大赦二月辛卯
清河王暉爲東海王越所害庾子石勒寇常山安北
將軍王浚討破之三月東海王越鎮鄆城劉元海侵
汲郡略有頓丘河內之地王彌寇青徐兗豫四州夏
四月丁亥入許昌諸郡守將皆奔走五月甲子彌遂
寇洛陽司徒王衍帥衆禦之彌退走秋七月甲辰劉
元海寇平陽太守宋抽奔京師河東太守力戰死之
八月丁亥東海王越自鄆城遷屯于濮陽九月石勒
寇趙郡征北將軍和郁自鄆奔于衛國冬十月甲戌
劉元海僭帝號于平陽仍稱漢十一月乙巳尚書令
高光卒丁卯以太子少傅荀藩爲尚書令己酉石勒
寇鄴魏郡太守王粹戰敗死之十二月辛未朔大赦
立長沙王乂子碩爲長沙王粲爲臨淮王

三年春正月甲午彭城王繹薨三月戊申征南大將
軍高密王簡薨以尚書左僕射山簡爲征南將軍都
督荆襄交廣等四州諸軍事司隸校尉劉暉爲尚書
左僕射丁巳東海王越歸京師乙丑勒兵入宮於帝

側收近臣中書令繆播帝舅王延等十餘人並害之
景寅曲赦河南郡丁卯太尉劉寔請老以司徒王衍
爲太尉東海王越領司徒劉元海寇黎陽遣車騎將
軍王堪擊之王師敗績于延津死者三萬餘人大旱
江漢河洛皆竭可涉夏四月左積弩將軍朱誕叛奔
于劉元海石勒攻陷冀州郡縣百餘壁秋七月戊辰
當陽地裂三所各廣三丈長一百餘步辛未平陽人
劉芒蕩自稱漢後誑誘羗戎僭帝號於馬蘭山支胡
五斗叟郝索聚衆數千爲亂屯新豐與芒蕩合黨劉
元海遣子聰及王彌寇上黨圍壺關并州刺史劉琨
使兵救之爲聰所敗淮南內史王曠將軍施融曹超
及聰戰又敗超融死之上黨太守龐淳以郡降賊九
月景寅劉聰圍浚儀遣平北將軍曹武討之丁丑王
師敗績東海王越入保京城聰至西明門越禦之戰
于宣陽門外大破之石勒寇常山安北將軍王浚使
鮮卑騎救之大破勒於飛龍山征西大將軍南陽王
模使其將淳于定破劉芒蕩五斗叟並斬之使車騎
將軍王堪平北將軍曹武討劉聰王師敗績堪奔還
京師李雄別帥羅羨以梓潼歸順劉聰攻洛陽西明
門不尅宜都夷道山崩荆湘二州地震冬十一月石

勒陷長樂安北將軍王斌遇害因屠黎陽乞活帥李
暉薄盛等帥衆救京師聰退走暉等又破王彌于新
汲十二月乙亥夜有白氣如帶自地升天南北各二
丈

四年春正月乙丑朔大赦二月石勒襲鄆城兖州刺
史袁孚戰敗爲其部下所害勒又襲白馬車騎將軍
王堪死之李雄將文碩殺雄大將軍李國以巴西歸
順戊午吳興人錢璿反自稱平西將軍三月丞相倉
曹屬周玘帥鄉人討璿斬之夏四月大水將軍祁弘
破劉元海將劉靈曜于廣宗李雄陷梓潼兖州地震

五月石勒寇汲郡執太守胡寵遂南濟河滎陽太守
裴純奔建鄴大風折木地震幽并司冀秦雍等六州
大蝗食草木牛馬毛皆盡六月劉元海死其子和嗣
僞位和弟聰弑和而自立秋七月劉聰從弟曜及其
將石勒圍懷詔征虜將軍宋抽救之爲曜所敗抽死
之九月河內人樂仰執太守裴整降于石勒徐州
監軍王隆自下邳棄軍奔于周馥雍州人王如舉兵
反於宛殺害令長自號大將軍司雍二州牧大掠漢
沔新平人龐寔馮翊人嚴嶷京兆人侯脫等各起兵
應之征南將軍山簡荊州刺史王澄南中郎將杜弢

並遣兵援京師及如戰于宛諸軍皆大敗王澄獨以衆進至汴口衆潰而歸冬十月辛卯晝昏至于庚子大星西南墜有聲壬寅石勒圍倉垣陳留內史王讚擊敗之勒走河北壬子以驃騎將軍王浚爲司空平北將軍劉琨爲平北大將軍京師饑東海王越羽檄徵天下兵帝謂使者曰爲我語諸征鎮若今日尚可救後則無逮矣時莫有至者石勒陷襄城太守崔曠遇害遂至宛王浚遣鮮卑文鴛帥騎救之勒退浚又遣別將王申始討勒於汶石津大破之十一月甲戌東海王越帥衆出許昌以行臺自隨官省無復守衛荒饉日甚殿內死人交橫府寺營署並掘塹自守盜賊公行枹鼓之音不絕越軍次項自領豫州牧以太尉王衍爲軍司丁丑流氏隗伯苻等襲宜都太守嵇晞奔建鄴壬申始攻劉曜王彌於瓶壘破之鎮東將軍周馥表迎大駕遷都壽陽越使裴頌討馥爲馥所敗走保東城請救於琅邪王睿襄陽大疫死者三千餘人加涼州刺史張軌安西將軍十二月征東大將軍苟晞攻王彌別帥曹嶷破之乙酉平陽人李洪帥流人入定陵作亂

五年春正月帝密詔苟晞討東海王越壬申晞爲曹

疑所破乙未越遣從事中郎將楊瑁徐州刺史裴盾
共擊晞癸酉勒入江夏太守楊珉奔于武昌乙亥李
雄攻陷涪城梓潼太守譙登遇害湘州流人杜攷據
長沙反戊寅安東將軍琅琊王睿使將軍甘卓攻鎮
東將軍周馥於壽春馥衆潰庚辰太保平原王幹薨
二月石勒寇汝南汝南王祐奔建鄴三月戊午詔下
東海王越罪狀告方鎮討之以征東大將軍荀晞爲
大將軍景子東海王越薨四月戊子石勒追東海王
越喪及於東郡將軍錢端戰死軍潰大尉王衍吏部
尚書劉望廷尉諸苟餘尚書鄭豫武陵王澹等皆遇

害王公已下死者十餘萬人東海世子毗及宗室四
十八王尋又没于石勒賊王桑冷道陷徐州刺史裴
盾遇害桑遂濟淮至于歷陽五月益州流人汝班梁
州流人蹇撫作亂於湘州虜刺史苟眺南破零桂諸
郡東掠武昌安城太守郭察邵陵太守鄭融衡陽內
史滕育並遇害進司空王浚爲大司馬征西大將軍南
陽王模爲太尉太子太傅傅祗爲司徒尚書令苟藩爲
司空安東將軍琅琊王睿爲鎮東大將軍東海王越
之出也使河南尹潘滔居守大將軍荀晞表遷都倉
垣帝將從之諸大臣畏滔不敢奉詔且宮中及黃門

戀資財不欲出至是饑甚人相食百官流亡者十八
九帝召群臣會議將行而警衛不備帝撫手歎曰如
何曾無車輿乃使司徒傅祗出詣河陰修理舟楫為
水行之備朝士數十人導從帝步出西掖門至銅駝
街為盜所掠不得進而還六月癸未劉曜王彌石勒
同寇洛川王師頻為賊所敗死者甚衆庚寅司空荀
藩光祿大夫荀組奔轅轅太子左率溫畿夜開廣莫
門奔小平津丁酉劉曜王彌入京師帝開華林園門
出河陰藕池欲幸長安為曜等所追及曜等遂焚燒
宮廟逼辱妃后吳王晏克陵王琳尚書左僕射和郁
右僕射曹叡尚書閻丘冲衣紫王緄河南尹劉默等
皆遇害百官士庶死者三萬餘人帝蒙塵於平陽劉
聰以帝為會稽公荀藩移檄州鎮以琅邪王為盟主
豫章王端東奔苟晞晞立為皇太子自領尚書令具
置官屬保梁國之蒙縣百姓饑餓米斛萬餘價秋七
月大司馬王浚承制假立太子置百官署征鎮石勒
寇穀陽沛王滋戰敗遇害八月劉聰使于粲攻隔長
安太尉征西將軍南陽王模遇害長安遺人四千餘
家奔漢中王粲奔石勒襲陽夏至于蒙縣大將軍
苟晞豫章王端立沒于賊冬十月勒寇豫州諸郡至

江而還十一月猗盧寇太原平北將軍劉琨不能制
後五縣百姓於新興以其地居之

六年春正月帝在平陽劉聰寇太原故鎮南府牙門
將胡亢聚眾寇荆土自號楚公三月壬子帝在會
癸丑鎮東大將軍琅邪王睿上尚書檄四方以討石
勒大司馬王浚移檄天下稱被中詔承制以荀藩為
太尉汝陰王熙為石勒所害夏四月景宣征南將軍
山簡卒秋七月歲星熒惑太白聚于牛斗石勒寇冀
州劉粲寇晉陽平北將軍劉琨遣部將郝詵帥眾禦
粲詵敗績死之太原太守高喬以晉陽降粲八月粲

伐劉琨奔于常山己亥陰平都尉董冲逐太守王鑿
以郡叛降于粲辛亥劉琨乞師于猗盧表盧為代
公九月己卯猗盧使子利孫赴琨不得進辛巳前雍
州刺史賈天討劉粲於三輔走之關中亦定乃與衛
將軍慕容暉北太守慕容紹共奉表呈都為皇太子於
長安冬十月猗盧自將六萬騎次于益城十一月甲
午劉粲遣使劉琨收其遺眾保于陽曲是歲大疫
七年春正月劉聰大會使帝著青衣行酒侍中庾珉
號哭聰意之下帝過弒胡于平陽時年三十帝初
誕有嘉禾生於豫章之南昌先是望氣者云豫章有

天子氣其後竟以豫章為皇太子在東宮恂恂謙損
接引朝士講論書籍及即位始遵舊制臨太極殿使
尚書郎讀經令又於東堂聽政至於宴會輒與群官
論衆務考經籍黃門侍郎傳言數曰今日復見武帝
之世矣秘書監荀勗又常謂人曰懷帝天姿清劬少
著英猷若遭承平足為守文佳主而繼惠帝擾亂之
後東海專政無幽厲之釁而有流亡之禍

孝愍帝

孝愍皇帝諱鄒字彥旗武帝孫吳孝之子也出
繼後伯父燕獻王肅襲封秦王永嘉三年拜散騎常

侍撫軍將軍及洛陽傾覆避難於滎陽密縣與舅荀
藩荀組相遇自密南赴許穎豫州刺史閻鼎與前撫
軍長史王毗司徒長史劉疇中書郎李昕及藩組等
同謀奉帝歸于長安而疇等中途復叛鼎追殺之藩
組僅而獲免鼎遂挾帝乘牛車自宛趣武關頻遇山
賊士卒亡散次于藍田鼎告雍州刺史賈疋疋遽遣
州兵迎衛達于長安又使輔國將軍梁綜助守之時
有玉龜出霸水神馬鳴城南焉六年九月辛巳奉秦
王為皇太子登壇告類建宗廟社稷大赦加疋征西
大將軍以秦州刺史南陽王保為大司馬賈疋討賊

張連遇害衆推始平太守麴允領雍州刺史為盟主
承制選置建興元年夏四月京午奉懷帝崩問舉哀
成禮壬申即皇帝位大赦改元以衛將軍梁芬為司
徒雍州刺史麴允為使持節領軍將軍錄尚書事京
兆太守索綝為尚書右僕射石勒攻龍驤將軍李暉
於上白暉敗死之五月壬辰以鎮東大將軍琅邪王
睿為侍中左丞相大都督陝東諸軍事大司馬南陽
王保為右丞相大都督陝西諸軍事又詔二王曰夫
陽九百六之災雖在盛世猶或邁之朕以幼冲纂承
洪緒庶憑祖宗之靈群公義士之力蕩滅凶寇拯援
幽宮瞻望未達肝心分裂昔周邵分陝姬氏以降平
王東遷晉鄭為輔今左右丞相茂德齊聖國之昵屬
當恃二公埽除鯨鯢奉迎梓宮克復中興令幽并兩
州勒卒三十萬直造平陽右丞相宜帥秦涼梁雍武
旅三十萬徑詣長安左丞相帥所領精兵二十萬徑
造洛陽分遣前鋒為幽并後駐赴同大限克成元勳
又詔琅邪王曰朕以冲昧纂承洪緒未能梟夷凶逆
奉迎梓宮枕戈煩寃肝心抽裂前得魏浚表知公帥
先三軍已據壽春傳檄諸侯協齊威勢想今漸進已
達洛陽涼州刺史張軌乃心王室連旗萬里已到汧

隴梁州刺史張光亦遣巴漢之卒屯在駱谷秦川驍
勇其會如林間遣使適還具知平陽之間云幽并隆
盛餘胡衰破然猶恃險當須大舉未知公今所到是
以息兵秣馬未便進軍今為已至何許當須來旨便
乘輿自出會除中原也公宜思弘謀猷勗濟遠略使
山陵旋反四海有賴故遣殿中都尉劉蜀蘇馬等具
宣朕意公茂德脞屬宣隆東夏恢融六合非公而誰
但洛都陵廟不可空曠公宜鎮撫以綏山東右丞相
當入輔弼追蹤周卻以隆中興也六月石勒害兖州
刺史田徽是時山東郡邑相繼陷于勒秋八月癸亥
劉蜀等達于揚州改建鄴為建康改鄴為臨漳杜弢
寇武昌焚燒城邑弢別將王真襲沔陽荊州刺史周
顛奔于建康九月司空荀藩薨于滎陽劉聰寇河南
河南尹張髦死之冬十月荊州刺史陶侃討杜弢黨
杜曾於石城為曾所敗己巳大雨雹庚午大雪十一
月流人楊武攻陷梁州十二月河東地震雨肉

二年春正月己巳朔黑霧著人如墨連夜五日乃止
辛未辰時日墮于地又有三日相承出於西方而東
行丁丑大赦楊武大略漢中遂奔李雄二月壬寅以
司空王浚為大司馬衛將軍荀組為司空涼州刺史

張軌為太尉封西平郡公并州刺史劉琨為大將軍
三月癸酉石勒陷幽州殺侍中大司馬幽州牧博陵
公王浚焚燒城邑害萬餘人杜弼別帥王真襲荊州
刺史陶侃於林鄣侃奔潁中夏四月甲辰地震五月
壬辰太尉領護羌校尉涼州刺史西平公張軌薨六
月劉曜趙苻苻新豐諸縣安東將軍索綝討破之秋
七月曜苻苻等又逼京都領軍將軍麴允討破之苻中
流矢而死九月北中郎將劉寅剋瑯丘斬石勒所署
太守邵攀景戌麟見襄平單于代公猗盧遣使獻馬
蒲子馬生人

三年春正月盜殺晉昌太守趙珮吳興人徐馥害太
守袁瑒以侍中宋哲為平東將軍屯華陰二月景子
進左丞相琅邪王睿為大都督督中外諸軍事右丞
相南陽王保為相國司空荀組為太尉大將軍劉琨
為司空進封代公猗盧為代王荊州刺史陶侃破王
真於巴陵杜弼別將杜弘張彥與臨川內史謝摛戰
于海昏摛敗績死之三月豫章內史周訪擊杜弘走
之斬張彥於陳夏四月大赦五月劉聰寇并州六月
盜發漢霸杜二陵及薄太后陵太后面如生得金玉
綵帛不可勝紀時以朝廷草創服章多闕勅收其餘

以實內府丁卯地震辛巳大赦勅雍州掩骼埋胔備
復陵墓有犯者誅及三族秋七月石勒陷濮陽害太
守韓弘劉聰寇上黨劉琨遣將救之八月癸亥戰于
襄垣王師敗績荊州刺史陶侃攻杜弼弼敗走道死
湘州平九月劉曜寇北地命領軍將軍麴允討之冬
十月允進攻青白城以豫州牧征東將軍索綝為尚
書僕射都督宮城諸軍事劉聰陷馮翊太守梁肅奔
萬年十二月涼州刺史張寔送皇帝行璽一紐盜殺
安定太守趙班

四年春三月代王猗盧薨其衆歸于劉琨夏四月丁

丑劉曜寇上郡太守藉韋率其衆奔于南鄭涼州刺
史張寔遣步騎五千來赴京都石勒陷廩丘北中郎
將劉寅出奔五月平夷太守雷焯害南廣太守孟桓
帥二郡三千餘家叛降于李雄六月丁巳朔日有食
之大蝗秋七月劉曜攻北地麴允帥步騎三萬救之
王師不戰而潰北地太守麴昌奔于京師曜進至涇
陽渭北諸城悉潰建威將軍魯克散騎常侍梁緯少
府皇甫陽等皆死之八月劉曜逼京師內外斷絕鎮
西將軍焦嵩平東將軍宋哲始平太守竺恢等同赴
圍難麴允與公卿守長安小城以自固散騎常侍華

輯監京兆馮翊弘農上洛四郡兵東屯霸上鎮軍將軍胡崧帥城西諸郡兵屯渡馬橋並不敢進冬十月京師饑甚米斗金二兩人相食死者大半太倉有麩數十麩麩允屑為粥以供帝至是復盡帝泣謂允曰今窘厄如此外無救援死於社稷是朕事也朕念將士暴離斯酷今欲聞城未陷為羞死之事庶令黎元免屠爛之苦行矣遣書朕意決矣十一月乙未使侍中宋敞送牋於曜帝乘羊車肉袒銜璧輿輓出降群臣號泣攀車執帝之手帝亦悲不自勝御史中丞吉朗自殺曜焚輓受璧使宋敞奉帝還宮初有童謡曰天子何在豆田中時王浚在幽州以豆有藿殺隱士霍原以應之及帝如曜營營實在城東豆田璧辛丑帝蒙塵於平陽麩允及群官並從劉聰假帝光祿大夫懷安侯壬寅聰臨殿帝稽首于前麩允伏地慟哭曰自殺尚書辛賓梁允侍中梁濟散騎常侍嚴敦左丞相減振黃門侍郎任播張偉杜曼及諸郡守並為曜所害華輯奔南山石勒圍樂平司空劉琨遣兵援之為勒所敗樂平太守韓據出奔司空長史李弘以并州叛降于勒十二月甲申朔日有食之己未劉琨奔薊依段匹磾

五年春正月帝在平陽庚子虹霓彌天三日並照平
東將軍宋哲奔江左李雄使其將李恭羅賓寇巴東
二月劉聰使其將劉暢攻滎陽太守李距擊破之三
月琅邪王睿承制改元稱晉王於建康夏五月景子
日有食之秋七月大旱司冀青雍等四州蝨蝗石勒
亦競取百姓禾時人謂之胡蝗八月劉聰使趙固襲
衛將軍華蒼於定穎遂害之冬十月景子日有食之
劉聰出獵令帝行車騎將軍戎服執戟為導百姓聚
而觀之故老或歔歔流涕聰聞而惡之聰後曰大會
使帝行酒洗爵口而更衣又使帝執蓋晉臣在坐者
多失聲而公書即辛賓抱帝慟哭為聰所害十二
月戊戌帝遇崩于平陽時年十八帝之繼皇統也
屬永嘉之亂天下崩離長安城中戶不盈百牆宇頽
毀蒿棘成林朝廷無車馬章服唯桑版署號而已衆
唯一旅公私有車四乘器械多闕運饋不繼巨猾滔
天帝京危急諸侯無釋位之志征鎮闕勤王之舉故
君臣窘迫以以至殺辱云

史臣曰昔炎暉杪暮英雄多假於宗室金德韜華顛
沛共推於懷愍楚陽寂寥丘車靡會豈力不足而情
有餘乎喋喋遺事有存其主譬彼詩人愛其棠樹夫

有非常之事而無非常之功詳觀發迹用非天啓是以輿棺齒劍可得而言焉于時五嶽三塗並皆淪寇龍川牛首故以立君股肱非挑戰之秋劉石有滔天之勢療飢中斷嬰戈外絕兩京淪狄再駕徂戎周王隕首於驪峯衛公亡肝於淇上思為一郡其可得乎于寶有言曰昔高祖宣皇帝以雄才碩量應時而仕值魏太祖創基之初籌畫軍國嘉謀屢中遂服輿軫驅馳三世性深阻有若城府而能寬綽以容納行任數以御物而知人善采拔故賢愚咸懷大小畢力爾乃取鄧艾於農墾州恭於行役委以文武各善其事故能西禽孟達東舉公孫內夷曹爽外襲王凌神略獨斷征伐四克維御群后大權在已於是百姓與能大象始構世宗承基太祖繼業玄豐亂內欽誕寇外潛謀雖密而在機必兆淮浦再擾而許洛不震咸黜異圖用融前烈然後推轂鍾鄧長驅庸蜀三關電掃而劉禪入臣天符人事於是信矣始當非常之禮終受備物之錫至于世祖遂享皇極仁以厚下儉以足用和而不弛寬而能斷故民詠惟新四海悅勸矣聿脩祖宗之志思輯戰國之苦腹心不同公卿異議而獨納羊祜之策杖王杜之決役不二時江湘來同

掩唐虞之舊域班正朔於八荒天下書同文車同軌
牛馬被野餘糧委畝故于時有天下無窮人之諺雖
太平未洽亦足以明吏奉其法民樂其生矣武皇既
崩山陵未乾而楊駿被誅母后廢黜尋以二公楚王
之變宗子無維城之助師尹無具瞻之貴至乃易天
子以太上之號而有免官之謠民不見德惟亂是聞
朝爲伊周夕成桀蹠善惡陷於成敗毀譽脅於世利
內外混淆庶官失才名實反錯天綱解紐國政迭移
於亂人禁兵外散於四方方岳無鈞石之鎮關門無
結草之固李辰石冰傾之於荆揚元海王彌撓之於

齊冀戎羯稱制二帝失尊何哉樹立失權託付非才
四維不張而苟且之政多也夫作法於治其弊猶且
作法於亂誰能救之彼元海者離石之將兵都尉王
彌者青州之散吏也蓋皆弓馬之士驅走之人非有
其先主諸葛孔明之能也新起之寇烏合之衆非吳
蜀之敵也脫未爲兵裂裳爲旗非戰國之器也自下
達上非鄰國之勢也然而擾天下如驅群羊舉二都
如拾遺芥將相王侯連頸以受戮后嬪妃主虜辱於
戎卒豈不哀哉天下大器也群生重畜也愛惡相攻
利害相奪其勢常也若積水於防燎火于原未嘗嘗

靜也器大者不可以小道治勢重者不可以爭競擾
古先哲王知其然也是以扞其大患禦其大灾百
皆知上德之生已而不謂浚已以生也是以感而應
之悅而歸之如晨風之鬱鬱北林龍魚之趨藪澤也然
後設禮文以理之斷刑罰以威之謹好惡以示之審
禍福以喻之求明察以官之尊慈愛以固之故衆知
向方皆樂其生而哀其死悅其教而安其俗君子勤
禮小人盡力廉耻篤於家閭邪僻消於胸懷故其民
有見危以授命而不求生以害義又况可奮辭大呼
衆之以干紀作亂乎基廣則難傾根深則難拔埋節

則不亂膠結則不遷是以昔之有天下者之所以長
久也夫豈無僻主賴道德典刑以維持之也昔周之
興也后稷生於姜嫄而天命昭顯文武之功起於后
稷至於公劉遭夏人之亂去郃之豳身服厥勞至于
大王爲戎翟所逼而不忍百姓之命杖策而去之故
從之如歸市一年成邑二年成都三年五倍其初至
于王季能類其德音至于文王而惟新其命由此觀
之周家世積忠厚仁及尊本內隆九族外尊事黃耆
以成其福祿者也而其妃后躬行四教尊敬師傅服
澣濯之衣備煩辱之事化天下以成婦道是以漢濱

之女守潔白之志中林之士有純一之德始於憂勤
終於逸樂以三聖之知伐獨夫之紂猶正其名教曰
遂取順守及周公遭變陳后稷先公風化之所由致
王業之艱難者則皆農夫女工衣食之事也故自后
稷之始基靖民十五王而文始平之十六王而武始
居之十八王而康克安之故其積基樹本經緯禮俗
節理人情恤隱民事如此之纏繇也今晉之興也功
烈於百王事捷於三代宣景遭多難之時誅庶孽以
便事不及脩公劉大王之仁也受遺輔政屢遇廢置
故齊王不明不獲思慮於毫高貴沖人不得復子明

辟也一祖逼禪代之期不暇待參分八百之會也是其
創基立本異於先代者也加以朝寡純德之人鄉乏
不貳之老風俗滯僻恥尚失所學者以老莊為宗而
黜六經談者以虛蕩為辨而賤名檢行身者以放濁
為通而狹節信進士者以苟得為貴而鄙居正當官
者以望空為高而笑勤恪是以劉頌屢言治道傳咸
每糾邪正皆謂之俗吏其倚杖虛曠依阿無心者皆
名重海內若夫文王日旰不暇食仲山甫夙夜匪懈者蓋
共嗤黜以為灰塵矣由是毀譽亂於善惡之實情慝
奔於貨欲之塗選者為人擇官官者為身擇利而執

鈞當軸之士身兼官以十數大極其尊小錄其要而世族貴戚之子弟陵邁超越不拘資次悠悠風塵皆奔執之士列官千百無讓賢之舉子直著崇讓而莫之省子雅制九班而不得用其婦女莊櫛織紵皆取成於婢僕未嘗知女工絲枲之業中饋酒食之事也先時而婚任情而動故皆不恥淫泆之過不拘妬忌之惡父兄不之罪也天下莫之罪也又況責之聞四教於古脩貞順於今以輔佐君子者哉禮法刑政於此大壞如水斯積而決其隄防如火斯畜而離其薪燎也國之將亡本必先顛其此之謂乎故觀阮籍之行而覺禮教崩弛之所由也察庾純賈充之爭而見師尹之多僻考平吳之功而知將帥之不讓思郭欽之謀而寤戎狄之有讐覽傅玄劉毅之言而得百官之邪核傅咸之奏錢神之論而覩寵賂之彰民風國勢如此雖以中庸之主治之幸有必見之於祭祀季札必得之於聲樂范燮必為之請死賈誼必為之痛哭又况我惠帝以放蕩之德臨之哉懷帝承亂得位羈於強臣愍帝奔播之後徒廁其虛名天下之政既去非命世之雄才不能取之矣淳耀之列未渝故大命重集于中宗皇帝贊曰懷佩玉璽愍君黃屋蓋三

嘉靖戊午刊

山鯨吞九服獯入金商穹居未與圜顧盡小方趾成
僵大夫反首彼我平陽主憂臣哭于何不滅故大命

外紀五帝帝者都之新治風其德各天下之知也夫

又此非真帝以效漢之彭祖之共刺帝承厲豈古

必影之林養樂必樂必為之請取賈請必為之議

或出期必其謂之五帝之筆自必具之休祭以孝

林於道如之夫建師之命而歸爾想之遠矣風國

帝紀第五 帝紀第五之言而得首首之

謂夫之必其謂之五帝之筆自必具之休祭以孝

謂夫之必其謂之五帝之筆自必具之休祭以孝



